

Xojon carta-la San Pablo xi ma-ne jò xi kiskii-la xita naxandá-la Cristo xi títsajna Corinto

*Kó tsò Pablo nga síhixat'aà jñà xita naxandá-la
Cristo xi títsajna Corinto*

¹ 'An, Pablo, tìsikasén-nò xojon jè, nga k'oaá s'ín kjòmejèn-la Nainá nga 'an tsibíxáya-na Cristo Jesús. 'An, kò 'ndsè Timoteo tìtsanìkasén-nòjen xojon jè. Tìtsanìhixot'aà-nòjen jñò xi xita naxandá-la Nainá 'mì-nò xi títsajnaà ya naxandá Corinto, kò ngats'iì xita tsjeè-la Cristo xi títsajna kóhokji nangui Acaya. ² Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya jjiin inima-nò.

Kó tsò Pablo nga tsjá-la kjondaà Nainá

³ Ndaà kàtayaxkón Nainá xi Na'èn-la ma Jesucristo xi otíxoma-ná. Jè Nainá xi Na'èn-ná ma, tse kjohimatakòn tjín-la it'aà tsaján. Kò jè, kjit'aà nàchrjein síje takoán. ⁴ K'e nga mé kjo'in títsajnajñaá, jè Na'èn-ná síjetakòn-ná mé-ne jñá, k'oaá tìs'ín síjetakoán xinguiáá xi tìkoa kjo'in títsajnajjìn koni s'ín kisìjetakòn-ná Nainá. ⁵ Koni tjín kjo'in xi tse nìkjaán xi kjoa ts'e Cristo, k'oaá tìs'ín tse kjojetakòn sakó-ná it'aà ts'e Cristo. ⁶ Ngajen, tsà kjo'in tìtsanìkjeiín-jen, kjondaà tsajòn-nò nga s'e-nò kjojetakòn, koa kitjokajñoò kjo'in. Tsà Nainá síjetakòn-najen, jè-né nga tìkoa jñò

s'e-nò kjojetakòn, koa kichikjoa ko-nò kjo'in xi jin titsanikjeiín-jen. ⁷ Tjín kixí kjoa xi chiñà-lajen it'aà tsajòn. Tíjiín-najen, koni s'ín tíhokot'aà-nò kjo'in xi titsanikjeiín-jen, k'oa tís'ín okot'aà-nò kjojetakòn xi tjín-najen.

⁸ Jñò 'ndsè ko tichjaá, mejèn-najen nga kàtasijiín-nò kjo'in xi kis'e-najen ján nangui Asia. Tse jchán kjo'in kinikjeiín-jen. Jyeé mì tì kii kichikjoako-nájen skanda mì tì kii bixón-najen tsà kítsajnakon isa-jen. ⁹ K'oaá s'ín komà-najen nga jyeé-la tjínè-la nga kiyá-jen. K'oaá s'ín komàt'in-jen mé-ne nga isa ndaà kjót'aà takòn-najen Nainá xi ma-la síkjaáya-la mik'en, nga mì tà yijo-najen kjót'aà takòn-jen. ¹⁰ Nga jyeé kjomeè k'en-jen, tanga Nainá tsasiko-najen nga kisikatojiín-najen kjo'in ko tákó sùkatojiín-isa-najen kjo'in. Ko k'oaá s'ín kjit'aà takòn-jen nga jè sùkatojiín isa-najen nita mé kjoa-ne. ¹¹ Jñò, mochjeén-né nga sichját'aà-nájen nga kinókjoat'aà-là Nainá it'aà tsajen mé-ne nga isa kjìn koma-ne xita xi kichjat'aà-la Nainá, tikoáá kjìn koma xita xi tsjá-la kjondaà Nainá koni s'ín machikon-t'in-jen.

Mé-ne mikì kii-ne Pablo ján Corinto

¹² Tjín jngoò kjoa nga ndaà nikítsajna-jen yijo-najen. K'oaá s'ín beè-lajen takòn-jen nga it'aà ts'e Nainá nchrobá-ne nga tsjeè ko kixi tihonguiko-jen yijo-najen i isò'nde, ko jè tjína ítòn it'aà tsajòn. Mitsà kjoachjine-la xi taxki xita nga ko'nè-jen, kjondaà-la Nainá-né. ¹³ Mitsà k'ejí kjoa nga titsachjiì-nòjen, ta jè-né nga kíkkejñoò ko kjoas'en-jiín-nò koni tsò 'én xi tjít'aà xojon jè. K'oaá s'ín majngoò takoàn nga nguì ndaà kjiya-nò ¹⁴ koni

s'ín jye kjòchiya chiba-nò nga tsja kàtama-nò it'aà tsajen ko nga tikoā tsjaā kōma-najen it'aà tsajon k'e nga kjoij lingoò k'a Jesucristo xi otixoma-ná.

¹⁵ 'An, jyeé ndaà tingoò takoàn it'aà ts'e kjoa koi, k'oā ma-ne nga k'oas'ín kiskoòsòn-là nga jò k'a kjikon-nò mé-ne jñò, jò kjondaà sakò-nò. [Tanga mì k'oā s'ín tsitasòn.] ¹⁶ K'oā s'ín kisikitsjeèn, k'e nga kiaà nangui Macedonia nga ya jahato itjòn-nò. Tjín-nè nga kjoahato lingoò k'a-nò k'e nga kjinchrobà-na mé-ne jñò kōma sichjât'aà-ná nga kjián nangui Judea. ¹⁷ K'e nga k'oas'ín kiskoòsòn-là, za k'oā s'ín kinikitsjeèn nga 'an, tìsiskáko-nò? Majìn, nga mì k'oā s'ín s'iaàn koni s'ín xi taxkì xita isò'nde. Mìtsà itjòn xan-nò: “Kōma-né”, ko tik'e-ne lingoò k'a xan-nò: “Mikì kōma.” ¹⁸ Tíbeè Nainá; 'én kixij xi kixan-nò, ngajen, mì k'oā s'ín nokjoà-jen nga bixón-jen: “Jon, kōma-né”, ko “Mikì kōma.” ¹⁹ Timoteo, Silvano ko 'an, k'oā s'ín nokjoàyajin-nòjen it'aà ts'e 'én-là Jesucristo xi ki'ndí-là Nainá. Tsjin-là 'én xi tsò jon ko majìn. Nainá jngoò k'a síkitasòn it'aà ts'e Cristo nga tsò: “Jon, kōma-né.” ²⁰ Ngats'ì 'én xi chja Nainá koni s'ín tsjá tso'ba, it'aà ts'e Cristo bitasòn yije-né. Nga jè Cristo xi tsò “kōma-né”. Ko it'aà ts'e Cristo, jñá bixón-ná: “K'oas'ín kàtama”, mé-ne jeya kijn-ne Nainá. ²¹ Jè Nainá, xi síkixiyandaà-ná nga jè titsajnaakoā Cristo [xi xó jaàjin-ne Nainá], tikoā jñá xó jaàjin-ná Nainá. ²² Ko tijè-ne Nainá xi tsibít'aà chiba-ná koni jngoò sello; kisikijnajin inima-ná jè Inima Tsjeè-là xi tjoé itjòn-ná nga kixi kjoa nga tikoā tjoé yije-ná kjondaà xi tjindaà-là nga tsjá-ná.

²³ Tíkotsejèn Nainá, jè tíbeè iníma-na, mé-ne kj'eè kii fí-na Corinto koni s'ín tíjìin-na; koií kjoa-la, majìn-na nga 'on koma-la iníma-nò nga 'én ts'en kichjako-nò. ²⁴ Ngajen, majìn-nòjen nga ngajen, kjo'ńó kotìxoma-nòjen it'aà ts'e 'én xi mokjeiín-nò. Ta saá nìchját'aà-nòjen mé-ne nga s'e-nò kjotsja nga kixi tìtsajnaà koni s'ín mokjeiín-nò.

2

¹ K'oaá ma-ne nga k'oas'ín kiskoòsòn-la nga mì tì kii kikon-nò. Majìn-na nga ba kìtsajnaà. ² Tanga tsà 'an, ba s'íkìtsajna-nò, nga koma iskan, mì tì yá tíjìn-ne xi sìtsjako-na, nga jńò, jyeé ba tìtsajnaà. ³ Koií xá jye kiskii jngoò-nò xojon, mé-ne k'e nga kìchokon ìjngoò k'a-nò nga mì ba s'íkìjna-ná nga mochjeén-né nga jńò sìtsjako-ná. Nga k'oaá s'ín tíjngoò takoàn, 'an, matsja-na tìkoá jńò, matsjaá-nò. ⁴ K'e nga k'oas'ín kiskii-nò, ndaà jchán kokájno-la iníma-na, baá kis'e-na skanda ndáxkoaàn tsibíxteèn. Tanga 'an mìtsà koi xá kiskii-nò nga kàtaba-nò. Jè-né nga jchaa nga 'ńó matsjake-nò.

Kó kitsò 'én xi kùichja Pablo it'aà ts'e xita xi tsohótsji jé

⁵ Jè xita xi tsohótsji jé, mìtsà ta 'an xi ba kisikìjna-na, mejèn tsà ba kisikìtsajna ngats'ii xita naxandá-la Cristo. Tà k'oaá xan-nò nga mì koto chiba-la koni s'ín tìxan-nò. ⁶ Nga k'jìn ma-nò xi tsibìné-là kjo'in jè xita jè; jyeé ndaà tíjìn, ta koma-ne. ⁷ I'ndeji, jè xi s'een nga sijchàat'aà-là jé-la; sijetakòn xita jè, mé-ne nga mì kjoba kiyájiín-ne. ⁸ K'oaá ma-ne nga bìtsi'bà-nò nga ndaà jchibàya-nò

nga ìjngòò k'a tìtsjacha xìt̃a jè. ⁹ Tìkoa koií xá kiskì-nò ìt'aà ts'e kjoa koi, mejèn-na skot'aà-nò, a kixìí kjoa nga ma-nò nìkitasòn yije. ¹⁰ Jè xìt̃a xì jñò nìjchàat'aà-là jé-là, tìkoaá 'an sùjchàat'aà-là. Tsà mochjeén-né nga 'an sùjchàat'aà-là xìt̃a jè, 'an jyeé kisìjchàat'aà-là xì kjòndaà tsajòn kò tìbèè Cristo. ¹¹ Mé-ne jè xìt̃a neíí mìkì koma jè sùkijne-ná, nga jyeé ndaà 'yaá kjoamaña-là kós'ín síxá.

Kó komà-là Pablo nga mìkì kisatùkjoò Tito ján Troas

¹² K'e nga ijchoa ján naxandá Troas, nga kichjàya 'én ndaà-là Nainá xì kjoa ts'e Cristo, ìt'aà ts'e Na'èn-ná kitáx'a'nde-na nga kisìxákoa 'én ndaà-là Nainá. ¹³ Tanga mìkì ndaà kis'e-là inìma-na nga mìkì kiskaàjñà jè 'ndsé Tito. K'oaá komà-ne kisikìtsajna jñà xìt̃a xì ya ì'nde-là, ìkjoàn kiaà ján nangui Macedonia.

Mé kjoa-ne nga jè Pablo tsjálà kjòndaà Nainá

¹⁴ Ndaà chjì-là Nainá nga ìt'aà ts'e Cristo fikò-najen k'e nga okó-lajen jñà xìt̃a isò'nde nga jye kisikijne. It'aà tsajen k'oaá s'ín obísòn kjohìtsjeèn-là Nainá xì kòs'ín ngaya-là koni jngòò jt̃a-là tsojmì xì 'ñó ndaà jne, mé-ne nga skoe-ne jñà xìt̃a nìt̃a ñánda-ne nga tìtsajna. ¹⁵ It'aà tsajen k'oaá s'ín ngaya-là koni nì'ndi-là chrjongó-là Nainá, k'e nga jè Cristo tsját'aà-là Nainá. K'oaá s'ín bijchókajìin-là jñà xìt̃a xì bitjokàjìin kjo'in kò xìt̃a xì chija. ¹⁶ It'aà ts'e jñà xìt̃a xì chija, [k'e nga beè-najen nga bènojmiya-jen 'én-là Nainá], k'oaá s'ín ch'o jne-là koni jngòò jt̃a xì sík'en-ná. Tanga jñà xìt̃a xì bitjokàjìin kjo'in, k'oaá s'ín ndaà jne-là koni jngòò jt̃a xì síkìjnakon-ná. It'aà ts'e

xá koi, nijngoò xita chíkjoa-la nga síkitasòn xi ta kjohítsjeèn ts'e. ¹⁷ Ngajen, mìkìl k'oas'ín 'nè-jen koni s'ín xita xi kj'eíí xi chjaya 'én-la Nainá nga tòn síkijne. Ngajen, 'én kixíí nokjoà-jen. Nainá tibeè-ne nga jè kisikasén-najen kò nga'ño ts'e Cristo-né nga nokjoàya-jen, nga jè Cristo titsajnakò-jen.

3

Xá-la Nainá xi kjoa xitse

¹ K'e nga k'oá-mì-nòjen kjoa koi, ¿a bìts'ia ìjngoò k'a-jen nga ndaà nìkítsajna-jen yijo-najen? Jño, ¿a k'oá s'ín nìkítsjeèn nga mìkìl tíj'nde-na nga ma sìxá tsà tsjìn-na xojon xi jño k'oi-ná, o xi kj'eíí xita tsjá-na koni s'ín síjé xita xi kj'eíí? ² Majìn, jño sobà-nò xi xojon-najen ma xi tíjìn ìjìn inìma-najen. Ngats'ìi xita beè-né koa bíxkejìn-né. ³ K'oá s'ín ndaà 'ya-jen nga jño-nò xi koni xojon-la Cristo xi ìt'aà tsajen kitjei. Jngoò xojon carta xi mìtsà tinta kitjei-ne; kóó Inìma Tsjeè-la Nainá xi tíjnakon kitjei-ne; mìtsà ndajò kitjeit'aà; yaá kitjeit'aà yijo inìma-la xita.

⁴ Kjoa koi, k'oá s'ín makixiya nga ìt'aà ts'e Cristo mokjeín-najen ìt'aà ts'e Nainá. ⁵ Xi ta nga'ño tsajen tsjìn-najen kjohítsjeèn mé xi s'en-jen. Tanga jè Nainá tsjá-najen kjohítsjeèn k'e nga mé xi 'nè-jen. ⁶ Jè Nainá tsjá-najen kjohítsjeèn nga chí'nda-la ma-jen mé-ne nga koma kìnókjoaya-najen ìt'aà ts'e kjondaà xitse xi Nainá tsibíndaajìn-kò jña xita. Mìtsà kjoa ts'e kjotíxoma xi xojon tíj't'aà, ts'eé Inìma Tsjeè-la Nainá. Jè kjoa xi ts'e kjotíxoma sík'en-ná nga nguixkon Nainá, tanga jè Inìma Tsjeè-la Nainá síkíjnakon-ná.

⁷ Jè k̲jot̲ixoma xi kitjoé-la Moisés xi ndajo kitjeit'aà, k̲joa biyaa j'ìk̲o. T̲anga k'e nga sa kitjoé it̲jòn-la k̲jot̲ixoma jè, k'oaá s'ín ki'ya-la k̲joa jeya-la Nainá. Jè Moisés, k'e nga j'ì-ne nga k̲iì mijìn-jno nindoò, j̲ñà x̲ita Israel m̲ik̲iì komà kiskoò'an Moisés nga 'ñó ote ni'ín k̲ji isén-la; t̲anga xi komà iskan, chaán kichijà xi ote k̲ji isén-la. Tsà k'oaá s'ín kis'e-la k̲joajeya, jè k̲joa xi t̲jínè-la nga chija, ⁸ isa jeya t̲jín k̲jondaà x̲itse xi tsjá-ná Nainá k'e nga tsjá-ná Inima Tsjeè-la. ⁹ Nga jeya j'ì jè k̲jot̲ixoma xi k̲joa biyaa tsibínè-ná, isaá 'ñó jeya k̲itasòn 'én xi nokjoàya-jen nga x̲ita kixi s̲ík̲itsajna-ná Nainá. ¹⁰ Nas'ín 'ñó kis'e-la k̲joa jeya jè k̲jot̲ixoma xi jye tsato, t̲anga m̲ik̲iì mangàsòn-k̲o jè k̲joajeya xi t̲jín-la k̲jondaà x̲itse; isaá 'ñó jeya t̲jna. ¹¹ Tsà jè k̲joa xi t̲ichijangui kis'e-la k̲joa jeya, isaá jeya t̲jín k̲joa x̲itse xi m̲i t̲i k̲iì chija-ne n̲ita kjé-ne.

¹² Nga t̲jingoò takòn-jen nga titsachiñá-lajen k̲joa koi, k'oaá ma-ne nga m̲ik̲iì masobà-najen nga nokjoá-jen. ¹³ M̲itsà k'oas'ín 'nè-jen koni kis'ìin Moisés nga nikje tsibíjtsa isén-la, mé-ne nga j̲ñà x̲ita Israel m̲ik̲iì komà kiskoò'an-ne nga jye t̲ichijangui xi ote k̲ji isén-la. ¹⁴ T̲anga j̲ñà x̲ita Israel k̲jot̲ajaaj̲iìn k̲joh̲ítsjeèn-la. Skanda nachrjein j'ndeì, k'e nga b̲ixkejiìn Xojon-la Nainá xi t̲jít'aà k̲joa jchínga xi tsibíndaaj̲iìn-k̲o x̲ita, tákó k'oaá s'ín ma-la koni tsà nikje x̲oba k̲ijtsa k̲joh̲ítsjeèn-la. Ta jngoó it'aà ts'e Cristo koma t̲jáxìn nikje jè. ¹⁵ Skanda nachrjein j'ndeì, j̲ñà x̲ita Israel, k'e nga b̲ixkejiìn xojon xi kisk̲iì Moisés, tákó k'oaá s'ín ma-la koni tsà nikje x̲oba t̲ijtsa'ma k̲joh̲ítsjeèn-la. ¹⁶ T̲anga k'e nga jngoò x̲ita s̲ík̲jahat̲j̲iya-la k̲joh̲ítsjeèn-la nga

fit'aà-la Na'èn-ná xi otíxoma-ná, tjáxìn-la níkjé xoba xi tíjtsa'ma kjohítsjeèn-la. ¹⁷ Nga jè Na'èn-ná, jè sobà-né xi Iníma Tsjeè-la Nainá. Ya ñánda tíjna Iníma-la Na'èn-ná, jña xíta títsajnandeíí-né kjoa ts'e kjotíxoma. ¹⁸ Ngats'iaá jña mì tì níkjé xoba tíjtsa'ma-ne kjohítsjeèn-ná. It'aà tsaján k'oaá s'ín ngaya-la koni jngoò chítsín xi ma chítsejèn-yá xi okó kjoa jeya-la Na'èn-ná. Kjit'aà nachrjein isa jeya tíhotsejèn koni kji Na'èn-ná nga jè Iníma Tsjeè-la tískjatjìya-ná.

4

Kó s'ín síhiseèn-ná jè 'én ndaà-la Nainá xi kjoa ts'e Cristo

¹ Koií kjoa-la ngajen, mìkiì mahindaà iníma-najen nga jè Na'èn-ná kjòhimakeè-najen nga xá ts'e kisingatsja-najen. ² Jyeé kichjaàxìn-jen jña kjoa ch'o xí tjí'ma, xi sisobà-najen; mìkiì chonachan-jen, nì mìkiì níkjatjìya-lajen 'én-la Nainá. Ngui 'én kixi bènojmi-jen, mejèn-najen nga nguixkon Nainá ngats'ii xíta kàteèxkon kjohítsjeèn-najen kós'ín 'nè-jen. ³ Jè 'én ndaà-la Nainá xi kjoa ts'e Cristo xi nokjoàya-jen, jña xíta xi ya tíchijajin kjoa ts'e jé-la, ta jña-né xi tíjtsa'ma kjohítsjeèn-la nga mìkiì fiya-la. ⁴ Jè xíta neií xi tíhotíxoma-la isò'nde nachrjein i'ndeí, xi kós'ín tíjna koni tsà nainá, jé bíchjoà xkon jña xíta xi mìkiì mokjeiín-la it'aà ts'e Cristo; nga jè bíjño kjohítsjeèn-la, mé-ne nga mìkiì skoe-ne kjoahiseèn-la 'én ndaà-la Nainá xi kjoa ts'e Cristo xi ñó jeya tíjna, nga jè Cristo xi okó kó kji xi ngui jè sobà Nainá. ⁵ Ngajen, mìtsà tà it'aà tsajen

nokjoà-jen k'e nga bènojmíya-jen 'én-la Nainá; it'aà ts'eé Jesucristo nokjoà-jen nga jè xi otíxoma-ná. Ngajen, tà chĩ'ndaá ma-jen nga ngajen nìxá-nòjen, koií-né nga matsjacha-jen Jesús. ⁶ Nainá, jè xi kitsò nga jè nì'ín kàtasíhiseèn i'nde ñánda jñò choòn, tìjè-né xi kisìhiseèn ijìin inìma-najen, mé-ne jñà xìtā xi kj'eí kòhiseèn-là nga skoexkon kjoa jeya-là Nainá koni s'ín 'ya-là ts'e Cristo.

Mé-ne tìjngoò-ne takoán nas'ín kjo'in tìtsanìkjaán

⁷ Kjondaà jè xi 'ñó tse chjì-là, yaá tìjìin yijo-najen. Tanga yijo-najen k'oaá s'ín ngayà-là koni tìjì nì'nde. Jè Nainá k'oaá s'ín kis'ìin mé-ne nga 'ya-là nga jè nga'ñó xi 'ñó ndaà tísíxájiin yijo-najen, it'aà ts'e Nainá nchrobá-ne; mìtsà it'aà tsajen nchrobá-ne. ⁸ 'Ñó kjìin ma-ne kjoa xi tìjìin-najen, tanga maá kìtjokàjiin-jen. Tìjìin kjoa xi makájno-najen, tanga mìkì mahindaà-jen. ⁹ Fìtjìngui kondraá-najen xìtā, tanga Nainá mìkì tsjeìin takòn-najen; jñà xìtā beètoòn-najen, tanga mìkì chíkjoa-là nga síkjesòn-najen. ¹⁰ Nìtā ñánda-ne nga onguí-jen, kjit'aà nàchrjein mejèn-là sìik'en-najen xìtā koni s'ín komàt'in Jesús; tanga jè Nainá, jè xi mejèn-là nga it'aà tsajen kàtā'ya-là nga jè Jesús xi tísíkíjnakon-najen. ¹¹ Ngajen xi tìtsajnakon-jen, kjit'aà nàchrjein tìjnat'aà chraña-najen kjoabiyaà xi jè ngatjì-là Jesús, mé-ne jè yijo-najen xi ma biyaà jchā-là kjoabinachon ts'e Jesús. ¹² Ngajen, kjo'íin tìtsanìkjeíin-jen skanda mejèn-là xìtā sìik'en-najen, tanga jñò kjoabinachon tísakó-nò.

¹³ K'oaá s'ín tìchjā Xojon-là Nainá nga tsò: “Mokjeíin-na k'oaá ma-ne nga kichjà.” Ngajen,

k'oaá t̄is'ín t̄jín in̄ima-najen it'aà ts'e 'én xi mokjeiín-najen, k'oaá ma-ne nga nokjoá-jen. ¹⁴ Jè Nainá xi kisikjaáya-la Na'èn-ná Jesús it'aà ts'e kjoabiyaà, 'ya-nájen nga t̄ikoáá kijchò nacherjein nga siikjaáya-najen koni s'ín jaáya-la Jesús. Ikjoàn ngats'iaá k̄jiko-ná ya nguixkon Nainá. ¹⁵ Ngats'iì kjoa koi, k̄jondaà tsajòn-nò, mé-ne isa k̄jìn koma-ne x̄it̄a xi t̄joé-la k̄jondaà-la Nainá, nga t̄ikoá isa jeya k̄jna Nainá nga k̄jìn ma x̄it̄a xi tsjá-la k̄jondaà.

¹⁶ K'oaá ma-ne mìkì mahindaà in̄ima-najen; kixiì kjoa yijo-najen tífehenguì-né; tanga Nainá, nacherjein nchijòn t̄isixit̄seya in̄ima-najen. ¹⁷ Jè k̄jo'in xi nikjeiín-jen i isò'nde, t̄a chibaá t̄jín. T̄a jngoò t̄jò oto. Tanga yaá sakó-najen k̄jondaà xi isa jeya t̄jín xi mìkì fehet'aà n̄it̄a k̄jé-ne. ¹⁸ Nga mìtsà j̄n̄a chit̄sejèn-lajen kjoa xi t̄jín isò'nde xi t̄sejèn, j̄n̄a chit̄sejèn-lajen xi mìkì t̄sejèn xi ts'e Nainá. Kjoa xi t̄ima i isò'nde, k̄joehet'aà-né, tanga j̄n̄a kjoa xi mìkì t̄sejèn, mìkì k̄joehet'aà n̄it̄a k̄jé-ne.

5

Ni'ya xi t̄jindaà-la Nainá ján ngajmì

¹ Yijo-ná k'oaá s'ín गया-la koni ni'ya xi t̄jín i it'aà nangui xi chiba nacherjein ma-la nga bixoña. Tsà k̄ixoña ni'ya jè, Nainá t̄jindaà jngoò-la ni'ya ján ngajmì, xi t̄jna n̄it̄a k̄jé-ne, nga mìtsà tsja x̄it̄a kisindaà-ne. ² K'oaá ma-ne nga imaá fahatse-la in̄ima-ná i isò'nde nga jè xi mejèn-ná nga n̄iton k̄itsajnayaá ni'ya-ná ján ngajmì. ³ Nas'ín sijna yijo-ná xi tsjach'á i'ndeì, Nainá tsjá ījngoò-ná xi yijo x̄it̄se. Jè in̄ima-ná mìtsà ch̄ija, yijo x̄it̄seé koma. ⁴ K'e nga tákó t̄jnakon yijo-ná koni jngoò

ni'ya xi ma bixòña, imaá fahatse-ná, maba-ná, mìkìi tsò takoán nga nìkíjna ni'ya-ná. Majìn-ná nga tjáxìn-ná ni'ya jè, jè xi mejèn-ná nga kàtaxitseyá yijo-ná mé-ne nga yijo-ná xi ma biyaà jngoò k'aá jchija nga jè kjoabinachon sìikijne-là. ⁵ Jè Nainá xi xó k'oas'ín tsibíndaà-ná kò kitsjaà-ná Inima Tsjeè-là mé-ne tìkixi-ne kjoa nga iskan tsjá yije-ná koni s'ín kitsjaà tso'ba.

⁶ Kjit'aá nachrjein k'oas'ín tìjngoò takoán it'aà ts'e Nainá kò k'oáá s'ín tìjìn-ná, k'e nga tákó tìjnakon yijo-ná i it'aà nangui koni jngoò ni'ya ñánda titsajnaá, kjiìn titsajna-lá ni'ya-là Na'èn-ná ján ngajmì. ⁷ K'oáá s'ín titsanijchá yijo-ná koni s'ín mokjeiin-ná it'aà ts'e Nainá, mì k'oáá s'ín mochjeén nga kòs'ín sijchá yijo-ná koni s'ín beè xkoaán. ⁸ Tìjngoò takoán it'aà ts'e Nainá, isaá-la ndaà tjin tsà sìkíjnaá yijo-ná, mé-ne nga ján kìtsajnakoaá Na'èn-ná ngajmì. ⁹ Koií kjoa-là nga ndaà sìkitasoán koni s'ín sasén-là Na'èn-ná, a i titsajnaá it'aà nangui a xi ján titsajnaá ján ngajmì. ¹⁰ Mochjeén-né nga ngats'iaá kìjchoaá nguixkon ñánda tìhotíxoma Cristo nga k'oi-lá kindá nga jngoò jngoáá; tjoé-ná chjí-ná mé kjoa xi kì'né nga titsajnaá isò'nde, a ndaà kì'né, o xi ch'o kì'né.

Én xi tsjá kjoa'nchán it'aà ts'e Nainá

¹¹ Nga yaxkón-jen Nainá koni s'ín ok'in-là, k'oáá ma-ne bènojímí-lajen xitá xi kj'eíí, mé-ne kòkjeiin-là it'aà ts'e Cristo. Nga nguixkon Nainá ndaà beèxkon-najen nga ndaà 'nè-jen, 'an k'oáá tìs'ín mejèn-ná nga tìkoa jño jyeé ndaà yaxkon-nájen. ¹² Mìtsà 'mì-nòjen nga tìjin ndaà nìkìtsajna-nájen yijo-najen tanga jè xi mejèn-najen

nga tsja kàtama-nò it'aà tsajen, mé-ne koma kinókjoa-là jñà xita xi tijnà ndaà síkítsajna-ne yijo-là koni s'ín tsejèn-là, tanga jè inima-là mikì ndaà síkinda. ¹³ Tsà ská-najen, koi-né nga Nainá nixá-lajen, tsà ndaà tjin kjohítsjeèn-najen, kjondaà tsajòn-nò nga jñò nixá-nòjen. ¹⁴ Jè kjoatjòcha-là Cristo jè kitsobà'ñó-najen nga ma fiko-najen koni s'ín mejèn-là, k'oaà tjin kjohítsjeèn xi kjochiya-najen nga jngoò xita k'en ngajo-là ngats'ii xita xi tjin isò'nde, k'oaà komà-ne nga ngats'ii xita k'en. ¹⁵ Jè Cristo k'en ngajo-là ngats'ii xita xi tjin isò'nde, mé-ne jñà xita xi títsajnakon mì tì k'oaà s'ín sijnchá-ne yijo-là koni s'ín mejèn-là yijo-là. K'oaà s'ín sijnchá yijo-là koni s'ín mejèn-là Cristo nga jè k'en ngajo-là koa jaáya-là it'aà ts'e kjoabiyaà.

¹⁶ I'ndeì mì tì kii k'oas'ín nìkítsjeèn-najen it'aà ts'e xita xi kj'eji kós'ín tsejèn, kó kjoàn, koni s'ín s'ín jñà xita isò'nde. K'e nga sa ítjòn k'oaà s'ín kinikítsjeèn-jen, jè Cristo, tsà taxki xita isò'nde-nè. Tanga i'ndeì mì tì k'oaà s'ín nìkítsjeèn-najen. ¹⁷ Jngoò xita, k'e nga Cristo tijnako, xita xitse-né it'aà ts'e Nainá. Jè kjoa jchínga jyeé tsato, jyeé kjòxitseya yije.

¹⁸ Ngats'ii kjoa koi it'aà ts'e Nainá nchrobá-ne, nga it'aà ts'e Cristo kichibàndaà-ná ko Nainá. Ko jè Nainá kitsjaà-najen xá nga koma kénojmi-jen kós'ín kjoóndaà-ne xita ko Nainá. ¹⁹ It'aà ts'e Cristo kisixá Nainá nga kisikjoóndaà-ne xita isò'nde. Mì tì kii kindà kis'iin-ne jé-là jñà xita. Ko kitsjaà-najen xá nga bènojmi-jen kós'ín ma nga chibàndaà-ná ko Nainá. ²⁰ K'oaà ma-ne ngajen síkasén-najen Cristo

nga nokjoà ngajo-lajen. K'oaá ngaya-la koni tsà jè Nainá tíbtsi'ba-nò. It'aà ts'e Cristo bìtsi'ba-nòjen: jchibàndaàko-nò Nainá. ²¹ Cristo, mìtsà jé tsohótsji; tanga xi kjondaà tsaján, Nainá, jé tsohónè yije-la ngats'iì jé xi tjin isò'nde, mé-ne it'aà ts'e Cristo, xita kixi komaá nga jè Nainá sìikixiya-ná.

6

¹ Ngajen, xi Nainá nixát'aà-lajen, bìtsi'ba-nòjen, kjondaà xi tsjá-nò Nainá, ndaà tikjeén. ² Nga jè Nainá, k'oaá tsò:

Ki'nchrè-lè k'e nga ndaà chiba-la kjòchjeén-lè
kjondaà-na,
tsohósikoó-lè, jè nàchrjein k'e nga tíchiñá-la nga
kitjojin kjo'in.

I'ndeì, jñò, ndaà tina'yaà. Jyeé ijchò nàchrjein ts'e kjondaà-la Nainá nga kitjokàjñò kjo'in.

³ Nimé kjoa xi ch'o 'nè-jen xi síkits'ón-jin-la xita xi kjeí, mé-ne jè xá-la Nainá xi jin titsa'nè-jen mì yá xi ch'o kichajno-la. ⁴ Nita mé kjoa xi 'nè-jen, ndaá onguíko-jen yijo-najen mé-ne jñà xita skoe-ne nga chi'nda-la Nainá 'mì-najen, nga 'ñó tjin-najen kjoatsetakòn, 'ñó ndaà chíkjoako-najen kjoa ts'e kjo'in, ko tíchijat'aà-najen mé tsojmì xi kochjeén-najen, koa chjá tíma-najen kjoa xi tíhotojin-jen, ⁵ nga tísat'é-najen, nga ndayá tnikjas'en-najen, nga ngajen binchaàtsji-lajen kjoasì naxandá, nga 'ñó nixá-jen, ko mìkìl tsafé-jen, skanda bìtsajna kjinchrá-nájen. ⁶ Tanga nguì tsjeé titsanìchá-jen yijo-najen; ndaá machiya-najen nita mé kjoa-ne; tjin-najen kjoatsetakòn ko kjondaà it'aà ts'e xita; ko jè Inima Tsjeè-la Nainá tísíxájin inima-najen; ko

nguì koó inima-najen nga tjín-najen kjoatjòcha.
⁷ Bènojmi-jen 'én xi kixi tjín. Tjín-najen nga'ño-la Nainá. Jǎa kjoa kixi xi 'nè-jen, k'oaá ngaya-la koni jǎa kicha xi kò ngaskón kò kixi mochjeén.
⁸ Tjín xita xi beèxkón-najen, tikoá tjín xi mìkì beèxkón-najen. Sakoáá ndaà chja it'aà tsajen, sakoáá majin. Tjín i'nga xi xita ndiso tsò-najen tanga ngajen 'én kixi nokjoá-jen.
⁹ Tjín i'nga xi k'oas'ín síkò-najen koni tsà mìkì beèxkon-najen, tanga tjín xi beèxkon-najen. K'oaá s'ín beèhikon-najen koni tsà jyeé k'en-jen, tanga titsajnakon-najen. Tsjá-najen kjo'in jǎa xita tanga mìkì biyaa-jen. ¹⁰ K'oaá s'ín ko'an-najen koni tsà ba tjín-najen, tanga ngajen tsja tjín-najen. Tsò-najen nga xita ima-né, tanga it'aà tsajen, kǐn jchán xita tísakó-la kjondaà ts'e inima-la. Nímé xi tjín-najen, tanga nguixkon Nainá, tjín yijeé-najen nita mé-ne.

¹¹ Jǎo 'ndseé xi Corinto tsajon, jyeé kinokjoa kixi-nòjen; nguì koó inima-najen matsjacha-nòjen. ¹² Ngajen, mìtsà bìxkon-nòjen kó tsò kjohítsjeèn-la inima-najen, jǎo-nó xi bìxkòon kó tsò kjohítsjeèn-la inima-nò. ¹³ K'oaá s'ín chjà-nò koni tsà ixti-na xan-nò, jǎo, k'oaá tis'ín t'een koni s'ín 'nè-jen, nga kò inima-nò titsjacha-najen.

Tinchat'aàxin-là kjoa ts'e jé

¹⁴ Jǎo, xi mokjeiin-nò it'aà ts'e Cristo, kǐ jǎa xita xi mìkì mokjeiin-la nìngàsòn-kò kjohítsjeèn-nò. ¿A komaá kòngàsòn-kò jngoò xita xi tjín-la okixi kò jngoò xi tsjìn-la okixi-la Nainá? ¿A komaá ya kitsajnajǎa nǎnda jǎo choòn nga tjín kjoa iseèn?

¹⁵ ¿A komaá ndaà kjiko xíkjin, jè Cristo kò xita

neíí? Tíkooáà mìkìì koma ndaà kjìkò xíkín jngòò xítà xi mokjeíìn-là ìt'aà ts'e Cristo kò jngòò xi mìkìì mokjeíìn-là. ¹⁶ Mìkìì koma ya sìjnaya ni'ya jngò-là Nainá jñà xkòsòn xi nainá tsò-là xítà. Nga jñá-ná xi 'mì-ná ni'ya jngò-là Nainá xi tíjnakon. Koni s'ín kitsò Nainá ìt'aà ts'e xítà xi mokjeíìn-là, tsò-né: 'An, yaá kótijnakoaa naxandá-na, tìkoáá yaá kojmejiìn-là.

'An-ná xi Nainá kítso-na koa jñà koma xítà naxandá-na.

¹⁷ Nainá k'oaá kitsò nga kùlchajììn-là xítà naxandá-la:

Tìtjokàjììn-là jñà xítà xi mìkìì mokjeíìn-là ìt'aà ts'an, koa tìnchat'aàxìn-là.

Nìmé kjoa chingàjñòò xi tjé tjín nga nguixkoaàn, mé-ne nga 'an koma skoétjò-nò.

¹⁸ 'An-ná xi skoétjò-nò koni jngòò Nà'èn, jñò koma ndí ìxti x'in-na kò ndí ìxti íchjín-na, k'oaá tsò Nà'èn-ná xi ta jè tajngoò xi 'ñó tse nga'ño tjín-là.

7

¹ Jñò ndí 'ndsè xi matsjake-nò, k'oaá tjín kjondaà xi tsjá-ná Nainá koni s'ín kitsjaà tso'ba. K'oaá ma-ne kìnchat'aàxìn-là ngats'ìì kjoa xi tjé tjín xi síkìts'ón yijo-ná kò inìma-ná, mé-ne tsjeè kìtsajnaá nga nguixkon Nainá. Ndaà jchaxkoán Nainá mé-ne nga kjit'aà nachrjein ìsà tsjeè sìjchá yijo-ná.

Mé-ne tsja ma-la Pablo kjoa xi s'ín xítà Corinto

² Chjoétjò-nájen nga kò inìma-nò. Ngajen, niyá xítà xi ch'o nìkò-jen; nì saá yá xítà nìkí'on-jen, nì saá jngòò xítà chonachàn-lajen. ³ K'e nga k'oas'ín

tìxan-nò, mìtsà mé kjoa xi ch'o tjin tìhonè-nò; jyeé k'oa kixan-nò nga sa ítjòn, kjit'aá nachrjein nga matsjacha-nòjen, nas'ín kiyá kò tsà titsajnakoaán, koo inima-najen nga matsjacha-nòjen. ⁴ Nguì 'én kixí xi tìchjàkò-nò; 'ño matsja-la inima-na it'aà tsajòn. 'Ñó tjin-na kjojetakòn kò taxkì tsjaá ma-la inima-na, nas'ín tse kjo'in tjin-najen.

⁵ K'e nga j'ii-jen i nangui Macedonia, nime xi komà kinikája-jen. 'Ñó kinikájno-jen; xkì xi ján kis'e-najen kjoasii, koa ya ijiin inima-najen 'ño kisinchaàxkón. ⁶ Tanga Nainá síjehikon-né xita xi indaà tjin ikon; kisijehikòn-najen k'e nga j'ii Tito. ⁷ Mìtsà tà koi kjoa-la nga j'ii Tito, jè-né nga jè, tikoá tsja tjin-la xi it'aà tsajòn. Tsibénajmí-najen nga jñò, 'ño mejèn-nò nga jchaxkon-nájen. K'oaà tì kitsò-najen nga ba titsajnaà koa makájno-nò it'aà ts'an. K'e nga ki'nchrè 'én koi, 'an, isaá ndaà kjòtsja-na.

⁸ Jñò, nas'ín tà kjoaba tsohotsji-nò k'e nga kisikasén ítjòn-nò xojon, i'ndeì, mì tì kii tìsikájno-na. Nga sa ítjòn kisikájnoa nga kisikasén jngoò-nò xojon, koi kjoa-la nga kisibaá chiba nachrjein-nò. ⁹ Tanga i'ndeì, matsja-la inima-na, mìtsà koi nga kjoaba kis'e-nò kjoa ts'e xojon, koi-né nga it'aà ts'e Nainá kinikájno jé-nò nga mì tì jé chinchaaàtsji-nò. Jñò, k'oaà s'ín kjòba-nò koni s'ín mejèn-la Nainá. K'oaà ma-ne nga nime kjoa ch'o kisakò-nò it'aà tsajen. ¹⁰ Jè kjoaba xi s'e-ná koni s'ín mejèn-la Nainá, jè síxájiin inima-ná nga nikájnoaà jé-ná nga mì tì jé binchaàtsji-ná mé-ne nga koma kitjokàjñaà kjo'in; kò mìtsà mé xi iskan sikájnoaà. Tanga jè kjoaba xi tsjá-ná isò'nde

nga mìkii mokjeiin-ná it'aà ts'e Nainá, jé síxájiin inima-ná nga kjoa biyaà fikó-ná. ¹¹ Tanga tikítsjeèn ngats'ii kjondaà xi ki'nè ta koi kjoa-la nga kjoaba kisakò-nò it'aà ts'e Nainá. I'ndeì tìtsajnaandaà-nò nga s'een kjoa xi tjínè-nò nga sikitason; k'oaá s'ín tìtsahokoò yijo-nò nga nímé jé tjín-nò; majticha-nò kjoa ts'e jé; i'ndeì tsakjoòn-chaà Nainá; mejèn-nò nga jchaxkon-ná; makájnoó-nò it'aà ts'an; k'oaá komà-ne nga kits'ii-là kjo'in jé xita xi tsohótsji jé. Ngats'ii kjoa koi koni s'ín ki'nè, k'oaá s'ín 'ya-la nga mìtsà ngats'ioò tjín-nò jé. ¹² 'An, koni s'ín kiskii-nò xojon carta xi kisikasén-nò, mìtsà jé tìsikítsjeèn it'aà ts'e xita xi tsohótsji jé; nì mìtsà it'aà ts'e xita xi kitsi'on kisikasén-nò xojon. Jè-né nga tijño ki'ya-nò nga nguixkon Nainá nga kixii kjoa nga tjòcha 'ya-nájen. ¹³ Maje takòn-nájen ngats'ii kjoa xi ki'nè.

Mìtsà ta koií kjoa-la nga maje takòn-jen it'aà ts'e kjoa koi; isa 'ño matsja-najen nga ki'ya-jen Tito nga 'ño tsja tjín-la, koií kjoa-la nga ngats'ioò kinìtsjakoo. ¹⁴ 'An, jyeé kos'ín ndaà kisikítsajna-nò nga nguixkon Tito koni kixan-la. Jño, nímé kjoa tjín xi ch'o kinikíjna-ná. Koni s'ín nga ngats'ii 'én xi ki'mi-nòjen, nguì 'én kixi-né, k'oaá tìs'ín kixi itjo koni tsò 'én xi kixan-la Tito nga ndaà kisikítsajna-nò. ¹⁵ Tito, isaá 'ño ndaà matsjakeè-nò k'e nga bìtsjeèn-la nga ngats'ioò ndaà kinìkitason-là kò ndaà kichjoétjò k'e nga ijchòkon-nò, koa 'ño ndaà kiyaxkón. ¹⁶ I'ndeì, it'aà tsajon ma'ñót'aà takoàn nita mé kjoa-ne, k'oaá ma-ne nga matsja-la inima-na.

8

Mé kjoa-ne nga ton maxkó-ne

¹ Ndí 'ndsè kò tichjaá, mejèn-na nga kàtasijìl-nò kjòndaà-là Nainá xí okó jìlìn naxandá-là Cristo xí títajna ya nangui Macedonia. ² Nas'ín 'ñó tse kjo'in nchihotojìlìn tìkoá tí'ya-là nga 'ñó mat-sja-là. Nas'ín 'ñó xita ima, jña tsojmì xí tsjá kjotjò-là Nainá, koo inima-là tsjá koni tsà 'ñó xita nchiná. ³ 'An, tíbe-ná nga koo kjotsja-là tsjá ton xí kjotjò ts'e Nainá koni kji bijchó nga'ñó-là, saà k'oaá skanda tsjásòn-né koni kji bijchó nga'ñó-là. ⁴ Jña xita koi, 'ñó tsibítsi'ba-najèn nga mejèn-là nga tìkoá sikkasén-là ton kjotjò jña xita naxandá-là Cristo jè j'nde ñánda kochjeén-là. ⁵ Jña xita koi, isaá tsato kitsjaá koni s'ín titsachiña-lajèn. Ítjòn nangui kisikítajna-là Nainá inima-là, ikjoàn, k'oaá ti s'ín kis'ìlìn it'aà tsajèn koni s'ín mejèn-là Nainá. ⁶ K'oaá ma-ne bítisi'ba-lajèn Tito koni s'ín tsibíts'iaqò xá xí kitjoé-là k'e nga sa ítjòn, k'oaá tís'ín kàtasíkjehet'aà-ne nga kàtíxkó ton kjotjò xí jño 'bioò. ⁷ Tanga jño, 'ñó ndaà 'nè-nò ngats'ìl kjoa xí 'nè nga ndaà mokjeíin-nò, nga ndaà nokjoà, nga ndaà tjín-nò kjoa chjine, nga titsajnandaà nga mejèn-nò sìchját'aà nita mé kjoa-ne, nga tjín-nò kjoatjòcha nga it'aà tsajèn komà-nò. Koni s'ín 'nè yije kjoa koi, k'oaá tís'ín tìkatonè-là jè kjotjò xí 'bioò.

⁸ Mìtsà k'oas'ín tìxan-nò koni tsà jngoò kjotíxoma tìtsja-nò. Jè xí mejèn-na nga skoeè a nguì kixij kjoa nga tjín-nò kjoatjòcha koni s'ín tjín-là xita xí k'ejí nga titsajnandaà nga tsjá kjotjò-là. ⁹ Jño, jyeé 'yaà kjòndaà-là Jesucristo xí otíxoma-ná. Xita

imaá kis'iin yijo-la xi kjondaà tsajòn, nas'ín ts'e yije-né ngats'ìi tsojmì xi tjin, mé-ne jñò tjoé-nò kjoa nchiná xi tjin-la.

¹⁰ Tsjaà jngoò-nò kjohítsjeèn it'aà ts'e kjoa jè. Kochjeén-nò nga ndaà sikitasòn koni s'ín tsibìts'iaḱoo jè nó xi tsato nga kits'ioò tòn xi kjotjò ts'e Nainá. K'oas'ín ki'nè nga kò kjotsja-nò kits'ioò.

¹¹ I'ndeì, tákó k'oaá s'ín t'een koni s'ín tsibìts'iaḱoo. K'oaá s'ín tikjehet'aà koni s'ín kjòmejèn-nò nga sa ítjòn. K'oaá kji tjioò koni kji bijchó nga'ñó-nò.

¹² K'e nga jngoò xita xi tijnandaà nga kò inima-la mejèn-la tsjá, k'oaá kji kàtatsjá koni kji ma xi s'ín, mìtsà tsato tijnijé-la. Nainá mìtsà tsato síjé koni kji ma xi 'nè.

¹³ Mìtsà koi kjoa-la nga kjo'in s'e-nò nga sichját'aà-lá xita xi kj'eíí, jè-né nga ngàsòn ngáya s'e-ná mé xi mochjeén-ná. ¹⁴ I'ndeì, jña xita koi, tsjin-la mé xi mochjeén-la, tanga jñò, tjin-nò. K'e nga kj'eíí nachrjein, jña xita koi, s'eé-la mé xi mochjeén-la, kò jña kosiko-nò k'e nga jñò tsjin-nò. K'oaá s'ín ngàsòn ngáya s'e-ná mé xi kochjeén-ná.

¹⁵ K'oaá s'ín tíchja Xojon-la Nainá nga tsò: “Jè xi kjìn tsibíxkó, nímé tsiningui-la, koa jè xi chiba tsibíxkó, nímé kisichjaàt'aà-la.”

Kós'ín komà nga kinikasén Tito ján Corinto

¹⁶ Ndaà chjí-la Nainá nga k'oas'ín tsibíjiin inima-la jè Tito nga tikoa kisikájno it'aà tsajòn koni s'ín 'an kisikájnoa. ¹⁷ Kixíí kjoa jè Tito kòkjeiín-la koni s'ín tsibit'ín-la; tikoa jè, 'ñó mejèn-la nga kiikon-nò; ikoón xi kitsò nga kjikon-nò.

¹⁸ Jè Tito tífikò jngoò 'ndsee xi ndaà síkíjna ngats'ìi xita naxandá-la Cristo xi tjin nita ñánda-ne;

nga jè 'ndseeé ndaà chjaya 'én ndaà-la Nainá xi kjoa ts'e Cristo. ¹⁹ Mìtsà tà koi kjoa koi, tikoáá jñà naxandá-la Cristo jaàjiin jè 'ndseeé nga koahijtako-najen nga onguiko-jen ton kjotjò-la Nainá xi ngajen titsabíxkó-jen mé-ne jè Na'én-ná jeya kίjna, tikoá skoe jñà xita nga koó inima-najen síchját'aà-lajen xita. ²⁰ K'oaá ma-ne nga mì yá xita kichjajno-najen kós'ín kochjeén ton xi tse tímáxkó. ²¹ K'oaá s'ín bìnè-lajen yijo-najen kjoa xi ndaà tjín nga nguixkon Nainá ko tikoá nguixkon xita.

²² Tito, tikoáá báhijtako ìjngoò 'ndsè xi xki xi ján ki'ya-jen nga 'ñó bìnè-la yijo-la nga kjín xá ma-la. Tjín kixi-né i'ndeì, ìsaá ndaà bìnè-la yijo-la nga síchját'aà-nò nga ìsa ndaà beè takòn-nò. ²³ Jè Tito, amigo ts'an-ná nga 'aán síxáko-na xi kjondaà tsajòn. Jñà xita 'ndseeé xi i'nga, jñà naxandá-la Cristo xi tjín nangui Macedonia jñà kisìkasén; nga it'aà ts'e xita 'ndseeé koi, jè Cristo jeya bijná. ²⁴ Takó-là xita koi kjoatjòcha xi tjín-nò, takó-là kjondaà xi tjín-nò koni s'ín jye okixan-la jñà xita 'ndseeé koi, mé-ne nga skoe-ne jñà naxandá-la Cristo xi i'nga nga kixi kjoa.

9

Mochjeén-né nga síchját'aà-lá xita-la Cristo xi kj'eìi

¹ Jè kjoa ts'e nga'ñó xi maxkót'aà-la jñà xita tsjeè-la Nainá xi kochjeén-la jè nga'ñó, mì tì kùì mochjeén-ne nga 'an skùì-isa-nò. ² Be-ná nga titsajnandaà nga mejèn-nò sikitason. K'oaá xan-la jñà xita xi nangui Macedonia ts'e nga jñò xi Acaya tsajòn, titsajnandaà-nò skanda jè nó xi

tsato nga mejèn-nò sikasén nga'ño. K'e nga kii'nchre jña xita Macedonia koni s'in titsa'nè, kjin ma-ne xi matsja-la it'aà tsajòn tikoáá kjòtsja-la nga mejèn-la siichjât'aà. ³ Koií xá tìsikasén-nò jña 'ndsee koi, mé-ne 'an mì ch'o kótijna-na tsà koi nàchrjein-la tsà ta 'én ndiso koma-ne koni s'in ndaà síkítsajna-nò it'aà ts'e kjoa koi, mé-ne jño titsajnandaà koni s'in kixan. ⁴ Kós'in koma-ne tsà koi nàchrjein-la kjiko i'nga-na xita Macedonia. K'e nga kijchò skoe-nò nga kj'eè kii titsajnandaà nga'ño xi sikasén. Tsà k'oas'in koma kjoa koi, ngajen kosobá-najen, kò jño, isaá 'ño kosobà-anò. Nga ngajen, it'aà tsajòn 'ño ndaà nikítsajna-nòjen. ⁵ Koií kjoa-la k'oaá s'in tìsikítsjeèn nga tsibìtsi'ba-la jña 'ndsee nga kisikasén ítjoàn, mé-ne nga kàtikon-nò koa kàtasíchjât'aà-nò nga kàtíxkòko-nò tòn kjotjò xi jye k'oas'in kits'ioò ndsobaa, mé-ne k'e nga jye tijnandaà kjotjò-nò jcha-la nga ijin inima-nò inchrobàjin-ne; mìtsà kjo'ño komà-nò.

⁶ Tìkítsjeèn jè 'én xi tsò: Jè xi chiba tsojmì bítje, chibaá tsojmì majchá-la; jè xi tse tsojmì bítje, kjin tsojmì majchá-la. ⁷ Nga jngoò ijngoò, k'oaá kji kàtatsjá koni kji kosòn-la inima-la. Mìtsà kò kjoba-la nga tsjá, nì mìtsà kjo'ño koma-la, nga Nainá tsjakeè-né xi kò kjòtsja-la tsjá. ⁸ Nainá koma-la tsjá yije-nò kjondaà xi tjin-la, mé-ne nga kjit'aà nàchrjein s'e yije-nò xi mochjeén-nò, skanda kininguii-nò mé-ne koma sìchjât'aà ts'e xá xi ndaà tjin. ⁹ K'oaá s'in tíchja Xojon-la Nainá nga tsò:

Kisika'bí-la xita ima nga kitsjaà-la mé xi mochjeén-la.

Kjoakixi-la, mìkiì kjoehet'aà nita kjé-ne.

¹⁰ Nainá tsjá tje-la tsojmì xi sitje, tikoá tsjá tsojmì xi chineé. Tsjá yije-nò xi mochjeén-nò nga kitjee; tikoáá síjchá tsojmì xi bitjee. Kjìn skoya kjondaà sakò-nò k'e nga kò kjoakixi-nò 'bioò kjotjò-nò.

¹¹ Jñò, s'e yije-nò ngats'ì kjoa nchiná xi tjín, mé-ne nga kò kjondaà-nò ma síhját'aà-là xita xi kj'eíí, nga síkasén-là kjotjò xi ngajen onguíko-jen. K'e nga tjoé-la jñà xita 'ndseeé, tsjá-la kjondaà Nainá.

¹² Jñà tsojmì kjotjò xi titsanikasén-là jñà xita 'ndseeé, mìtsà ta koi kjoa-la nga kochját'aà-la mé xi chija-la, tikoá koií-né nga isa kjìn koma xita xi tsjá-la kjondaà Nainá. ¹³ Jñà xita koi, k'e nga tjoé-la tsojmì kjotjò, jeya sílkíjna Nainá. K'oaá s'ín skoe-ne nga kixíí kjoa nga jñò nìkitasòn-nò 'én ndaà-la Nainá xi kjoa ts'e Cristo koni s'ín mokjeíín-nò. Jñà xita koi skoexkón Nainá it'aà ts'e tsojmì kjotjò xi 'biì-là kò xi 'biì-là jñà xita xi kj'eíí. ¹⁴ Koó inima-la kichjat'aà-la Nainá it'aà tsajòn, nga 'ñó tse kjondaà tísakó-nò xi tsjá-nò Nainá. ¹⁵ jNdaà chjí-la Nainá nga 'ñó tse kjondaà tsjá-ná, skanda tsjìn-ná 'én kós'ín k'oi-lá kjondaà!

10

Kó tsò Pablo nga chjatjì xá-la nga chí'nda-la ma Cristo

¹ 'An xi Pablo 'mì-na, bìtsi'bà-nò it'aà ts'e Cristo xi tjín-la kjondaà, kò xi indaà tíjna inima-la. Tjín xita xi tsò-na nga ima kjoa xó s'iaàn k'e nga ya tijnajìnnò, kò 'ñó xó ts'en s'iaàn k'e nga kjìnn tijnáa.

² Tikoá bìtsi'bà-nò k'e nga kjíkon-nò, jñò, ítjòn jchibàya-nò kjoa xi tjín-nò, mé-ne k'e nga kìjchoa,

kì kii bìnè-nájen nga 'ńó kichjàkoaa jǎà x̣ita xi k'oas'ín nchitsò nga k'oaá s'ín titsa'nè-jen koni s'ín xi taxḳi x̣ita isò'nde. Tanga 'an, tǐj̣n̄a ndaà-ná nga koj̣tikoaa jǎà x̣ita xi chjajno-najen. ³ Kix̣í kjoa nga x̣ita isò'nde 'mì-najen, tanga mì k'oas'ín bixkán-jen koni s'ín kjaán jǎà xi taxḳi x̣ita isò'nde. ⁴ Kicḥa xi nìkjeén-jen, mìtsà kicḥa ts'e isò'nde. Nga'ńó ts'e Nainá-né xi ma-la síkixòña nga'ńó-la x̣ita neǐ xi bíchjoà ikòn-la 'én-la Nainá. ⁵ Nìkixòña-najen ngats'ì kjoǎ́tsjeèn xi ch'o tǐj̣n̄ kjoa 'nga takòn xi kondra ts'e kjoachjine-la Nainá. Ndobà'ńó-najen ngats'ì kjoǎ́tsjeèn mé-ne koma ḳitasòn-la Cristo koni s'ín mejèn-la. ⁶ Titsajnaandaà-najen nga k'oi-lajen kjo'in x̣ita n̄ita mé kjoa-ne xi mìkii ndaà bitasòn-la, k'e nga jye jcha-la nga jǎò kix̣i nìkitasòn.

⁷ Jǎò, tà k'oaá s'ín cḥitsejèn-la koni s'ín 'ya-la jǎà x̣ita. Tsà tǐj̣n̄ i'nga x̣ita xi tsò-la yijo-la nga jè Cristo kisikasén, ndaà ḳatasíḳtsjeèn, ṭikoa ngajen jè sobà Cristo kisikasén-najen. ⁸ Mìkii masobà-na nga ndaà síkij̣na yijo-na ìt'aà ts'e kjoǎ́xoma xi kisingatsja-najen Cristo mé-ne koma sìchjât'aà-nò nga isa 'ńó ḳitsajnaà; kjo mìtsà koi-ne nga 'an sikits'ón-jìin-nò. ⁹ Maj̣n̄-na nga k'oas'ín sìḳitsjeèn nga 'an mejèn-na ḅinchaxkón-nò k'e nga xojon ṭisikasén-nò. ¹⁰ Tǐj̣n̄ i'nga x̣ita xi tsò: “Xojon-la, 'ńó jchán tǐj̣n̄, 'ńó ṭichja, tanga k'e nga ì ṭijnajìin-ná mìtsà 'ńó xkón kji. 'Én xi chja, mì yá xi ndaà beèxkón.” ¹¹ Jǎà x̣ita xi k'oa tsò, ndaà ḳatasíḳtsjeèn koni tsò xojon xi n̄ikasén-jen k'e nga ḳjìin titsajna-jen. K'oaá ṭis'ín s'en-jen k'e nga ya titsajnajìin-nòjen.

¹² Kix̣í kjoa, ngajen, maj̣n̄-najen nga sìingàsòn-kjoòko-jen jǎà x̣ita xi ṭi yijo-la ndaà

síkítsajna-ne. Jñà x̣ita xi k'oas'ín s'ín, x̣ita tòndò-né. Tṣjìn-là kjohítsjeèn nga ṭi cḥiba ts'ée síchiba-ne yijo-là. Ṭikoa ṭi xíkjin síchibakjoò-ne. ¹³ Ngajen, miḳi ṣikatonè-lajen cḥiba-là nga ndaà ṣíkítsajna-jen yijo-najen. K'oaá ḳi koni ḳi tṣjá cḥiba Nainá it'aà ts'e xá-najen. Jè Nainá kitsjaà-najen xá xi ijchòko-nòjen skanda ján Corinto. ¹⁴ Kò tsà mì-là ngajen ijchò ítjòn-jen, kix̣i ḳjoa kinikatonè-lajen cḥiba-là i'nde koni ḳi kitjò'nde-najen. Tanga ngajen-najen xi ijchòko ítjòn-nòjen 'én ndaà-là Nainá xi ḳjoa ts'e Cristo. ¹⁵ Mìtsà j̣in ndaà n̄íkítsajna-jen yijo-najen it'aà ts'e xá xi nchis'ín x̣ita xi ḳj'eíí. Mìtsà titsan̄ikatonè-lajen cḥiba-là koni ḳi xá xi oko-najen. Chiñàḳjoa-najen, koni s'ín ìsa 'ñò ndaà ḳokjeiín-nò, ḳo ìsaá ḳotseya xá xi titsa'nè-jen. Tanga ta k'oaá ḳi ṣixá-jen koni s'ín ṭjen cḥiba-là. ¹⁶ K'oaá s'ín kén̄ojm̄iya-jen 'én ndaà-là Nainá jñà naxandá xi fi-ìsa ñánda kijna naxandá tsajòn. Tanga mì ȳa ḳitjás'en-j̄in-jen i'nde ñánda j̄ye nchisíxá x̣ita xi ḳj'eíí nga mì j̄in ndaà ṣíkítsajna-jen yijo-najen xá xi nchis'ín x̣ita xi ḳj'eíí.

¹⁷ Jè xi jeya ṣíkíjna yijo-là, ta saá Nainá jeya k̄atasíkj̄ina. ¹⁸ Mìtsà jè xi ndaà bitjongui xi ṭi yijo-là ndaà ṣíkíjna-ne it'aà ts'e mé ḳjoa xi s'ín. Jè Nainá xi k'oa ḳitsò tsà kix̣i ḳjoa nga ndaà x̣ita.

11

Pablo, jè xi nguì x̣ita-là Cristo nga jè tsibíxáya-là

¹ T'een kjondaà, ṭiná'ya jngoò tjò-ná; k'oaá s'ín ṭichjàko-nò koni jngoò x̣ita xi mì ndaà ṭjna kjohítsjeèn-là. K̄atas'e-nò ḳjoatsejta. ² Koni s'ín

makájno-la Nainá, 'an, k'oaá tís'in makájno-na it'aà tsajòn nga mì kj'eíí xítà kónguít'aà-là. Ta jngoó x'in tsibindaàjiin-ko-nò nga sìngatsja-nò, jè Cristo. 'An mejèn-na nga tsjeè sìngatsja-nò Cristo koni jngoò tsòti xongó. ³ Tanga tsakjoòn-ná tsà k'oas'in komat'ioòn koni komat'in Eva nga kiskoònachàn-là jè ye, tsà ya kits'ón-jiin kjohítsjeèn-nò nga kìnchat'aàxìn-lá jè kjoatjòcha kixì xi tjín-nò kò Cristo nga mì tì tjingoò-ne takòn nga onguít'aà-là. ⁴ Nga bìi'nde-là nga kj'eíí xítà bijchókon-nò xi kj'eíí tsò 'én xi okóya-nò it'aà ts'e Jesús koni tsò 'én kixì xi jìn bènøjmí-nòjen, kò mokjeiín-nò nga choétjò jngoò inima xi kj'eíí xi mìtsà jè Inima Tsjeè-là Nainá xi jye kichjoétjò. Tìkoa, mokjeiín-nò nga kj'eíí tsò 'én ndaà-là Nainá xi kjoa ts'e Cristo xi bènøjmí-nò koni tsò xi kòkjeiín-nò nga sà ítjòn. Nga ndaà sasén-nò nga jñà na'yà-là xítà koi. ⁵ 'An, mìtsà isa nangui tijnà-là jñà xítà xi 'mì-là jñò nga isaá 'nga títsajna-là jñà xítà xi tsibíxáya-là Cristo. ⁶ 'An, nas'in mìkiì ndaà ma-na chjà, nìmé kjohítsjeèn chijat'aà-na xi it'aà ts'e 'én-là Nainá. Jñò, jyeé ndaà 'yaà, 'an, nìta ñánda nga tijnà, k'oaá s'in tsakoò-nò.

⁷ ¿A ch'oó kis'iaàn nga tsakoòya-nò 'én ndaà-là Nainá nga nìmé kisikíchí-nò? Nangui tsohótijnako-nò skanda kisihima-ná yijo-na mé-ne jñò isa 'nga kisikítsajna-nò. ⁸ Jñà xítà naxandá-là Cristo xi xìn i'nde-là kisichját'aà-na nga tsachrjekájno-là ton mé-ne komà kisixáko-nò nga tsibenøjmí-nò 'én ndaà-là Nainá xi kjoa ts'e Cristo. ⁹ K'e nga tsohótijnako-nò, nìyá xi kisijti-là mé xi kichiját'aà-na. K'e nga mé tsojmi

xi kjòchjeén-na, jñà x̱iṯa 'ndseé xi j'ìi-ne nangui Macedonia kitsjaà-na. Nga majìn-na nga cẖjá koma-nò. Nàchrjein xi fi-isa, tákó k'oaá s'iaàn.

¹⁰ Ngui ḵoó kjoakixi-ḻa Cristo koni ṯixan-nò nga mì yá xi kotichjoà-na kóhokji nangui Acaya nga ndaà síkíjna yijo-na kjoa xi ṯis'iaàn nga mì ṯon kisìjé-nò.

¹¹ ¿Mé-ne k'oa xan-na nga cẖjá? ¿A koi-né nga mìkìl matsjake-nò? Tíbeè Nainá, 'an 'ñó matsjake-nò.

¹² Tanga tákó k'oaá s'iaàn koni kisìḵo-nò nga sa ítjòn nga ṉimé kisìjé-nò mé-ne nga mìkìl ts-jaà'nde-ḻa nga ḵitso jñà x̱iṯa xi mejèn-ḻa nga jeya síkítsajna yijo-ḻa nga k'oaá ṯis'ín nchis'ín koni ngajen. ¹³ X̱iṯa koi, x̱iṯa ndiso-né. Mìtsà kixi kjoa nga x̱iṯa xi jè Cristo tsibíxaya-ḻa. Ta konachan-né nga síkjatj̱iya-ḻa yijo-ḻa koni tsà jè Cristo tsibíxaya-ḻa. ¹⁴ Kjoa koi, mìtsà kjoa x̱iṯse; ṯijè-ne x̱iṯa neíí síkjatj̱iya-ḻa yijo-ḻa koni jngoò àkjaḻe-ḻa Nainá xi ote kji. ¹⁵ Mìtsà xkón ṯjín, xó k'oaá koma-ne nga jñà x̱iṯa xi síxá-ḻa jè x̱iṯa neíí, k'oaá s'ín síkjatj̱iya-ḻa yijo-ḻa koni tsà x̱iṯa xi ḇénojmí 'én kixi-ḻa Nainá. X̱iṯa koi k'e nga kjoehet'aà nàchrjein-ḻa, k'oaá s'ín ḵomat'ín koni s'ín ṯjín kjoa ch'o xi nchis'ín.

Mé kjoa-ne nga jeya síkíjna yijo-ḻa Pablo

¹⁶ Ìjngoò k'a k'oa ṯixan-nò, ḵi k'oaá s'ín ṉikítsjeèn nga mìkìl ndaà ṯjín kjohítsjeèn-na. Tsà k'oas'ín síkítsjeèn, ṯjìi'nde-ná nga 'an, k'oa ṯis'ín ndaà síkíjna itsé yijo-na koni s'ín x̱iṯa xi i'nga xi mì ndaà ṯjín kjohítsjeèn-ḻa. ¹⁷ K'e nga ḵos'ín tichjà, mìtsà k'oas'ín cẖjá koni s'ín sasén-ḻa Ṉa'èn-ná, k'oaá s'ín tichjà koni jngoò x̱iṯa xi mì ndaà ṯjín kjohítsjeèn-ḻa nga ṯi'an ndaà síkíjna-na yijo-na. ¹⁸ Koni s'ín ḵjìn ma

xita xi tijnà ndaà síkítsajna-ne yijo-la it'aà ts'e kjoa xi s'ín, 'an k'oaá tís'ín mejèn-na nga t'an ndaà síkíjna-na yijo-na. ¹⁹ Jñò, bixón-nó nga xita chjine-nò, tanga, ¿mé-ne biì'nde-là jñà xita xi mì ndaà tsò kjohítsjeèn-la? ²⁰ Jñò, nìkjeiín-là xita xi kjo'ño s'ín-nò nga chi'nda 'nè-là, xita xi ma-la síkjehejno-nò tsojmì xi tjín-nò, xita xi jñò beètòòn-nò, xita xi ochrjekàngui-nò, koa nìkjeiín-là xita xi síjts'iìn-'a isén-nò. ²¹ Jñò, ¿kó s'ín nìkítsjeèn? ¿A masobà-na nga indaàkjoa kinìkò-nòjen nga mì k'oaá s'ín kinìkò-nòjen koni kisìkò-nò jñà xita xi i'nga?

Tsà tjín i'nga xi 'ño ts'en s'ín nga chja, 'an tìkoa ts'eén tís'iaàn koni s'ín 'ño tìchjako-nò. Tanga ta k'oaá s'ín tìchjà koni tsà mìkiì ndaà tjín kjohítsjeèn-na.

²² Jñà xita koi, tsà kixi kjoa nga xita hebreo-né, 'an, tìkoaá xita hebreo-ná. Tsà xita Israel-né, 'an, tìkoaá xita Israel-ná. Tsà tje-la Abraham-né, 'an, tìkoaá tje-la Abraham-ná. ²³ ¿A chi'nda-la Cristo-né? 'An, isaá ndaà síxá-la Cristo. (K'e nga kòs'ín chjà, k'oaá ngaya-la koni jngoò xita xi mìkiì ndaà tjín kjohítsjeèn-la.) 'An isaá 'ño síxá-la. Isaá kò kjìn k'a ótijnaya ndayá, isa kò kjìn k'a síki'on-na xita, tìkoa kò kjìn k'a nga jye kjomeè sík'en-na xita. ²⁴ Jñà xita judío, 'òn k'a kitsjaà-na kjo'in nga tsakajá-na xox'ín xi s'e-la kohòyo xi kaàn chrj'oòn ñjòn tjín-ne nga jngoò ñngoò k'a. ²⁵ Jàn k'a kits'iìn-na kjo'in nga tsajá-na xkajnchra jñà xita; jngoò k'a tsibínè-na ndajo xita nga mejèn-la sùik'en-na; jàn k'a kiskaàjiìn-ndáko-na chitso ya ijììn ndáchikon; jngoò nàchrjein kò jngoò nùtjen

tsohótijnajñaà ijììn ndáchikon. ²⁶ Nìta ñánda nga ojmeè, ta kjòxkón t́ín kjit'aà-la. T́ín kjòxkón ya xajngá nandá ñánda nga otoa. T́ín kjòxkón ts'e xìta chijé. T́ín kjòxkón it'aà ts'e xìta xinguiáa judío koa t́ín it'aà ts'e xìta xi mìtsà xìta judío. T́ín kjòxkón ya ijììn naxandá, koa ya i'nde it'aà xìn ñánda tsjìn xìta. T́ín kjòxkón ya ijììn ndáchikon, koa ya ijììn-la xìta xi tsò nga xìta-la Cristo ma tanga mìtsà kixì kjoa. ²⁷ Kjìn jchán xá kisinè-na xi 'ñó t́ín, sà k'oaá skanda mìkìl ójnafè. Kisìkjiaán kjinchrá. Sà k'oaá tsjìn-na nandá xi ma 'yò, sà k'oaá skanda mìkìl tsoókjeen, kisìkjiaán 'nchán nga tsjìn-na nikje xi ójnakjá.

²⁸ Mìtsà tà jña kjoa koi xi komàt'ian. T́ín ìsa xi kj'eijí xi ìsa 'ñó t́ín. Nàchrjein nchijòn makájno-na kjoa xi tímat'in kóhotjín naxandá-la Cristo xi 'an síkinda. ²⁹ Tsà yá 'ndseeé xi ma indaàjììn, tìkoaá 'an, ma indaàjììn-ná. Tsà yá xi mejèn-la ótsji jé-la jngoò xìta xi kj'eijí, 'an ma jtike-ná. ³⁰ Tsà mochjeén nga tì yijo-na ndaà síkíjna-na, jè ndaà síkíjna yijo-na it'aà ts'e kjoa xi mahindaàjñaà. ³¹ Jè Nainá xi Na'èn-la Jesucristo xi otíxoma-ná, jeya kàtìjna nìta kjé-ne, tìbeè-ne nga 'én kixìí xi tìchjà. ³² K'e nga tsohótijna ján naxandá Damasco, jè xìta xi gòbernador t́jna nga jè kitsjaà-la xá jè xìtaxá itjòn xi 'mì Aretas, kitsjaà-la okixì nga kisìkinda xotjoa-la naxandá nga mejèn-la tsobà'ñó-na. ³³ Tanga jña xìta kisìchját'aà-na nga kisìkíjnaya-na nìsiyá, ìkjoàn ya tsachrje-na ñánda tìx'á chrjó ndajo xi t́índiì-la naxandá nga kiskinjen-t'aà-na skanda it'aà nan-gui. K'oaá s'ín komà-ne nga mìkìl komà kit-sobà'ñó-na.

12

Pablo, kits'ù jngoò-la nijná xi kixi kjoa

¹ Nímé xi sîkijne nga ndaà sîkíjna yijo-na. Tanga mochjeén-né nga k'oa xán-nò kjoa xi tsakó-na Nainá k'e nga tsohókó-na, jè kjoa xi Nainá kisikichiya-na. ² Beèxkon-ná jngoò xita xi fît'aà-la Cristo. Tjín-la te ñijòn nó nga kiìkò Cristo skanda jè ngajmù xi ma-ne jàn [ñánda tíjna Nainá]. Mìkiì be tsà k'oaá s'in kiìkò nga yijo, a xi tà inìmaá kiìkò. Jè Nainá tíjìn-la. ³ Tanga be-ná nga jè xita jè, kiì. A yijo-né, o a tà inìmaá kiì, tà jngoò Nainá tíbeè. ⁴ Kiì skanda ján j'nde ñánda ndaà jchán choòn ján ngajmù ñánda tíjna Nainá. Kiì'nchré 'én xi 'ñó xkón tjín, xi nijngoò xita koma s'enojmí-la. ⁵ Koni komàt'in xita jè, jè-né xi ok'in-la nga ndaà kíjna. Tanga it'aà ts'an mìkiì ok'in-na nga 'an ndaà sîkíjna yijo-na. Tajngoò tsà jña kjoa xi mahindaàjñaà ndaà sîkíjna. ⁶ Tsà ndaà sîkíjna yijo-na [koni tjín kjoa xi 'an kijtseè ngajmù], mitsà 'én ská benojmiá, 'én kixij chjà. Tanga majìn-na nga ndaà sîkíjna yijo-na it'aà ts'e kjoa xi kijtseè mé-ne nga nijngoò xita isa 'nga sîkíjna-na ta ngatjì-la kjoa koi. Kòs'in kàtasíkinda-na kó s'iaàn, kó s'in chjà, kò kó s'in tìsìjchá yijo-na.

⁷ Mé-ne nga mì 'an ndaà kótijna-na it'aà ts'e kjoa xi 'an tsakó-na Nainá xi jeya jchán tjín, kiskaàt'aà jngoò-na ch'in, k'oaá ngaya-la koni tsà na'yá nchajìn yijo-na. Jè xita neij kijtseètoòn-na nga kisikasén-na kjo'in. ⁸ Kò jàn k'a bítsi'ba-la Nà'èn-ná nga kàtjaàxìn-na kjo'in jè. ⁹ Tanga jè Nainá ta k'oaá tsò-na: “Jè kjondaà-na yaá tíjnako-lè. Yaá okoaà yije nga'ñó-na k'e nga tsjìn-lè nga'ñó.”

K'oaá ma-ne jè kjoa xi mahindaàjñàà, jè xi ndaà síkíjna-na yijo-na, mé-ne nga jè nga'ño-là Cristo kíjnakò-na. ¹⁰ Koií kjoa-là matsja-na k'e nga ma indaàjñàà. Tíkoáá matsja-na k'e nga chja'on-kò-na xita, k'e nga mé tsojmì xi chija-na, k'e nga fitjingui kondra-na xita, k'e nga mé kjoa xi 'iín ma-na síkjaán it'aà ts'e Cristo. K'e nga ma indaàjñàà, k'ée ìsa ndaà s'e-là nga'ño inima-na [nga jè Cristo tsjá-na].

¹¹ 'An, k'oaá s'ín kichjà, koni s'ín chja xita 'én xi nímé chjí-là. Tanga jñò ki'nè-ná kjo'ño. Jñò xi tjínè-nò nga ndaà síkíjna-ná. Nga 'an mìtsà ìsa nangui tìjna-là jñà xita xi 'mì-là jñò nga ìsa 'nga títasajna-là jñà xita xi tsibíxáya-là Cristo; nas'ín 'an nímé chjí-na. ¹² K'e nga tsohótijnakò-nò kis'e-na kjoatsejta nga tsakoò-nò kjoaxkón xi okó chibà kò xi okó kjoa jeya-là Nainá kò nga'ño-là. Kjoa koi okó nga kixi kjoa nga 'an-ná xi tsibíxáya-na Cristo. ¹³ ¿Jñò, mé xi ìsa nangui kisíkítsajna-nò koni jñà naxandá-là Cristo xi kj'eíí? ¿A koií majti-nò nga mì jñò kisìjti-nò k'e nga mé tsojmì xi kichjàt'aà-na? Tìjchàat'aà-ná nga nímé kisìjé-nò.

Kó kitsò Pablo nga òjngò k'a tífikon jñà xita Corinto

¹⁴ Jyee tìjnandaà xi ma-ne jàn k'a nga kjíkon-nò. Táko k'oas'ín s'iaàn, mìtsà mé xi sìjé-nò. Mìtsà koi otsjià mé tsojmì xi tjín-nò; kjondaà tsajòn xi otsjià. Nga jñà xita jchínga tjínè-là nga koiitjò ton xi kochjeén-là ixti, mìtsà jñà ixti tjínè-là nga koiitjò ton xi kochjeén-là xita jchínga. ¹⁵ Matsjaá-na nga sìkjèya yije mé xi tjín-na, skanda tìsikjè yijo-na kjoa

ts'e inima-nò. Nga isa ndaà matsjake-nò, jñò, ¿a isaá chiba matsjacha-ná?

¹⁶ Kixií kjoa, 'an, nímé tsojmì xi kisijé-nò. Tanga tjín i'nga xita xi tsò: “Ñó maña nga konachan-la xita.” ¹⁷ Tanga, ¿mé xi kiskoönachan-nò k'e nga kisikasén i'nga-nò xita? ¹⁸ Tsibítsi'ba-la Tito nga kiikon-nò kò jè 'ndsè xi ìjngoò. Jè Tito, ¿a kiskoönachaaan-nò? ¿A mìtsà ngàsòn tikoi-ne kjohítsjeèn tjaàjiin-jen, tikoa tikoi-ne ndiyá kixi tjaàya-jen?

¹⁹ ¿A k'oaá s'ín nìkítsjeèn nga yijo-najen titsanokjoàtji-jen? Majìn, tíbeè Nainá koi 'én xi titsanokjoà-jen nga Cristo titsajnakò-jen. Jñò ndí 'ndsè xi 'ñó matsjake-nò, ngats'ìi kjoa koi, kjondaà tsajòn-nò nga isa tse ngañó kàtas'e-nò. ²⁰ Makájno-na tsà k'e nga kijchokon-nò tsà mì k'oaá s'ín titsa'nè koni s'ín mejèn-na. Koa 'an tsà mì k'oa s'ín tìs'iaàn koni s'ín mejèn-nò jñò. Koií makájno-na tsà koií nachrjein-la titsabixkàn-kjoò, tsà kjoaxìtakòn tjín-nò, tsà kjoajti tjiin inima-nò, tsà jò tsà jàn ya titsajna-là xinguiò, tsà 'én ndiso titsabìnè-là xinguiò, tsà xinguiò titsanokjoájno-lá, tsà 'nga takòn titsa'nè kò tsà mìkìi ndaà titsajnakoo xinguiò nga jngoò ìjngoò. ²¹ Tikoaá makájnoó-na k'e nga kijchokon ìjngoò k'a-nò tsà Nainá sìsobà-na nga nguixkoòn jñò. Tsà Nainá sìkjindáya-na xi kjoa tsajòn nga kjin ma-nò xi jye kjòtseé binchaàtsjioò jé nga mìkìi nìkájno jé-nò kjoa tjé xi 'nè kò kjoa chijngui xi 'nè kò ngats'ìi kjoa ch'o xi 'nè.

'Én-la Pablo xi fehet'aà-ne.

¹ Jè xi ma-ne jàn k'a nga kǐ́kon-nò. K'oaá s'ín tíchja Xojon-la Nainá nga tsò: “K'e nga tsà jngoò x̣iṭa mejèn-la ḳiindaàj̣iìn jngoò kjoa, jò kò tsà jàn x̣iṭa kochjeén xi koma tsjá 'én nga xkon kijtseè-ne kjoa xi komà mé-ne nga jcha-la, a kixií kjoa, o xi majìn-né.” ² K'oaá s'ín jye kixan kixi-nò k'e nga ijchòkon-nò xi ma-ne jò k'a, kò j'ndeí nas'ín kjiìn tijnaa, k'oaá ṭi xan ijngoò k'a-nò nga jñà xi jé tsohòtsji nga ṣa ítjòn kò xi nchihòtsji jé skanda j'ndeí, mìkiì kojno-la nga tsjaà-la kjo'iìn nga jngoò ijngoò. ³ 'An, k'oaá s'iaàn mé-nè nga jcha-nò, a kixií kjoa nga 'an ṣíkjeén-na Cristo nga chjàj̣iìn-nò 'én-la. Mìtsà indaàkjoa Cristo; ṭjín-la nga'ño k'e nga ṣixáj̣iìn inima-nò. ⁴ Kixií kjoa jè Cristo, k'oaá s'ín k'en-t'aà krò koni jngoò x̣iṭa xi tsjìn-la nga'ño. Tanga j'ndeí, nga'ño ts'e Nainá ṭjínakon-ne. Ngajen, k'oaá ṭis'ín indaàkjoa ṭitsajna-jen koni s'ín komàt'in Cristo, tanga nga'ño ts'e Nainá ḳitsajnakon-najen koni Cristo mé-ne nga koma ṣixá-nòjen.

⁵ Jñò, chít'aà inima-nò, tsà kixií kjoa nga ndaà mokjeiìn-nò it'aà ts'e Nainá. Ndaà chít'aà inima-nò xi ṭijñò-nò. ¿A mìtsà ṭj̣iìn-nò nga Cristo ṭj̣naj̣iìn inima-nò? Ṭa jngoò-la tsà mìkiì tsatojioòn koni s'ín kichit'aà-nò. ⁶ Tanga 'an, majngoò takoàn nga jchaà it'aà tsajen, ngajen tsatoj̣iìn yije-nàjen koni s'ín kichit'aà-najen. ⁷ Koií kjoa-la ḅítsi'ba-lajen Nainá nga n̄imé jé ḳinchátsjioò. Tanga mìtsà koi-ne nga jcha-najen nga ndaà bitjo-jen k'e nga chit'aà-najen. Jè-né nga ṣikitasòn jñò kjoa xi ndaà ṭj̣ín, nas'ín k'oas'ín kàta'ya-la it'aà tsajen koni tsà mìkiì chíkjoa-najen kjoa xi otoj̣iìn-jen. ⁸ Mikiì koma

kondra k̄itsajna-lajen x̄it̄a xi s̄íkitasòn kjoakixi-la Nainá. T̄a saá k'oi-lajen nga'ñó. ⁹ Matsja-najen k'e nga j̄ñò tjín-nò nga'ñó, nas'ín ngajen ma indaàj̄in-jen. K'oaá ma-ne nga bitsi'bà-lajen Nainá, mé-ne j̄ñò n̄imé kjohítsjeèn chijat'aà-nò. ¹⁰ T̄ikj̄i-nò xoj̄on jè k'e nga tákó kj̄iìn t̄ijn̄aa-isa, mé-ne k'e nga k̄ijchokon-nò mì t̄i k'oaá s'ín 'ñó kichj̄ak̄o-nò koni s'ín tjín kjot̄ixoma xi kitsjaà-na Nainá. Nga Nainá m̄itsà koi xá kitsjaà-na kjot̄ixoma nga 'an s̄íkits'ón-j̄iìn-nò, jè-né nga ìsa kixi k̄itsajnakoo 'én xi mokjeiín-nò.

Kó kitsò Pablo nga síhixat'aà x̄it̄a Corinto

¹¹ Ndí 'ndsè k̄o tichjaá, jè xi fehet'aà-ne, tsja t'è-là in̄ima-nò; kixi t̄itsajna; t̄ijetakòn xinguīoo; tà jngoò kjohítsjeèn k̄atas'e-nò, 'nchán t̄itsajnakoo xinguīoo. Nainá xi tjín-là kjoa 'nchán k̄o xi tjín-là kjoat̄jòcha k̄at̄ijnak̄o-nò. ¹² Nga nguì k̄oó in̄ima-nò t̄iixat'aà xinguīoo nga jngoò ìjngoò. ¹³ Ngats'ii x̄it̄a-là Nainá xi ì t̄itsajnak̄o-na síhixat'aà-nò.

¹⁴ Jè kjondaà-là Jesucristo xi ot̄ixoma-ná, k̄o kjoat̄jòcha-là Nainá, k̄o In̄ima Tsjeè-là Nainá k̄at̄ijnak̄o-nò ngats'ioò. K'oaá s'ín k̄atama.

'Én-lā Nainá xi kjoa ts'e Jesucristo
New Testament in Mazatec, San Jerónimo Tecóatl
Mazateco de S Jeronimo Tecoatl; maa
(MX:maa:Mazatec, San Jerónimo Tecóatl)

copyright © 2013 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9f778253-d34e-5037-af35-7bca16479aa0